

Futbola

Haakaan Mild Realera

Suediarrak hurrengo hiru denboralditan jokatuko du Realean

Realak bi fitxaketa burutu ditu denboraldi berrirako: Kovacedvic serbiarra eta Mild suediarra. Realaren baieztapenik jaso ez bada ere, orain arte Goteborg taldean jokatu duen Mildek Realean jokatuko du hurrengo hiru denboralditan. Almeyda argentinarrarekin ere negoziatzen ari da Realak.

Erredakzioa / Donostia

REALAK denboraldiko bigarren fitxaketa burutu du: Haakaan Mild suediarrena. Mild erdilari erosokorra da, 25 urte dauzka, IFK Goteborg taldean jokatu du eta internacionala da, 1994ko Mundialean jokatu zuen. Realean Karpinek utzi duen lekua beteko du. Lerro hauek idaztean Realaren baieztapen ofizialik jaso ez bada ere, ziurra da Mildek Realean jokatuko dituela hurrengo hiru denboraldiak.

Iñaki Otegi, Realeko gerentea, izan da negoziaketan eraman duena. Otegi Suedian izan da eta atzo arratsaldean lortu zuen akordioa. Realak 300 milioi pezeta (12 milioi libera) inguru ordainduko ditu. Dirudienek, kontratuak daukan puntu batengatik, Mildek Goteborgekin jokatuko du abuztuan talde honek daukan Txapelaldun Ligako aurre-kanporaketa. Jokalaria aste honetan helduko da Donostiara.

Bestalde, fitxaketa berriak egiteko negoziaketetan jarraitzen du Realak. Luis Uranga, Realeko lehendakaria, Argentinan da. Bertan River Plate taldeko Almeyda gaztea, 22 urtekoa, fitxatu nahi du. Jokalari hau Karpin ordezkatzuko lukeen aurrelari erasokorra izango zen. Ez da erraza



Ia ziurra da Markus Purk Austriako talderen bati utziko diola Realak datorren denboraldian.

ANDER GILLENEA

izango jokalaria fitxatzea beste talde batzuek ere (Zaragoza, Valencia eta Barcelona) jokalaria-rengatik interesa agertu dutelako. Barcelonaren kasuan, Stoitxkov fitxatu ondoren, badirudi uko egin diola Almeyda fitxatzeari. Jokalaria EEBBetan dago orain Atlantako Joko Olimpikoen parte hartzeko.

Purk, ziurrenik, Austriara • Markus Purk suediarra, berriz, ziurrenik ez du jokatuko datorren denboraldian Realean. Austria aldera itzuliko da, baina Realak ez dauka jokalaria alde batera uzteko asmorik. Ziurrenik, Realak, denboraldi baterako utziko lioke Purk Austriako talde bati.

Bestalde, joan den denboraldian Realeko hirugarren atezain

Iñigo Arteagak Bigarren B Mailako Ferrol taldean jokatuko du datorren denboraldian.

Bitartean Realeko jokalariai hasi dira denboraldi berrirako prestaketekin. Jokalari multzo batek atzo egin zituen azterketa medikuak eta gaur beste multzo batek egingo ditu.

Realaren aurkezpena bihar 20.00etan egingo da Anoeta estadioan. Euskal Telebistak zuzenean eskainiko du ekitaldia eta bertan The Golden Apple Quartet taldearen emanaldia ere izango da. Sarrera dohainik izango da bertara joan nahi duten ikusleentzat. Bertaratzen direnek, Realeko jokalariek harmailara botako dituzten 100 baloietako bat jaso ahal izango dute. Jokalari guztien sinadura eramango dute baloi horiek. X

Herri Kirolak

Hierro ezusteko txapelalduna txingetan

Nuarbek eta Gaztedik irabazi dituzte urrezko lehen dominak sokatiran

Jon Olaskoaga / Donostia

ARABAR batek irabazi du ezustea emanda Euskal Herriko txingero txapelketa. Roman Hierrok Juan Lertxundik baino plaza erdi bat gehiago egin zuen Iruñeko Foruen Enparantzan eta titulua bereganatu zuen. Hierrok ez zuen dominik lortu aurreko bi urteetako txapelketetan. Igandean, ordea, inork baino hobeto hartu zituen txingak eta 16 plaza osatu zituen. Juan Lertxundi iazko txapelaldunak plaza erdi gutxiago egin zuen eta Patxi Larretxeak —1993 eta 1994ko txapelaldunak— 15 plaza pasatxo egin ondoren brontzea eskuratu zuen. Atzetik sailkatu ziren Petrirena eta Agirregabiria.

Iruñeko jaialdi berean, bi-bitako Sanferminetako aizkolari saria egin zen. Donato Larretxeak eta Felix Etxeberriak osatutako bikotea izan zen azkarrena sei oinbikoak eta sei kanaerdikoak mozten. Irabazleen denbora 23.30 izan zen. Mikel Mindegia-Antonio Senosiain 35 segundora amaitu zuten eta Nazabal-Jaunarena 56 segundora.

Larunbatean Laukizen Euskal Herriko lur gaineko Sokatira Txapelketako lehen dominak banatu ziren. Nuarbek eraman zuen gizonezkoen 600 kiloetan urrea eta emakumezkoen 560 kiloetan Gaztedirentzako izan zen lehen postua. Gizonezkoetan Gaztedik txapela lortzeko aukerak zituen, baina horretarako

lehen postuan amaitu behar Laukizen. Izurietaren gizonak lehen postua lortzeaz egon ziren, baina azken despenpatean Nuarbe nagusitu zen. Brontzea Goierrik jaso zuen.

Emakumeetan txapela Gaztedik eramango zuela erabakita zegoen. Berdintasuna Mutriku eta Haitzazperen arteko lehian zegoen. Mutrikuarrak hobeto aritu ziren eta beraiek eskuratu zuten zilarrezko domina. Haitzazpe brontzearekin konformatu zen.

Igandean Nabarnizen amaitu zen Bizkaiko Gizon-proba Txapelketa. Jon Olea Sakoneta izan zen indartsuena lau unte egin ondoren. Salterainek hiru eta hiru laurden egin zituen eta Altolak hiru unte eta erdi. X

laburrean

RUGBYA

■ Australiak 21-16 irabazi zion Hego Afrikari bigarren jardunaldian

HIRU NAZIOETAKO Torneoaren bigarren jardunaldia jokatu zuten Sydney, Australiak eta Hego Afrikak. Australiak ez zuen oso joko ikusgarria egin, baina irabaztea zuen helburu Zeelanda Berriaren aurka lotsagabe geratu ondoren. Lehen zatia 11-3 amaitu zuten aurretik Roff-en entseguari esker. Bigarrenean Tim Horan izan zen entsegugilea 21-9 aurreratuz. Bi minutu eskas falta zirela, Hendriks hegalki txukundu zuen markagailua afrikarrentzat. Heldu den larunbatean Hego Afrika-Zeelanda Berria neurtzeko jokatuko da. X

■ Ingalaterra V Nazioetako Torneotik kanpo utzi dute

V NAZIOETAKO TORNEOA hanka-motz geratuko da hemendik aurrera Ingalaterraren kanporatzearekin. Izan ere, apirilaren 13an sortutako arazoaren amaiera besterik ez da izan. Orduan sortu zen Ingalaterraren eta gainerako lau Nazioen arteko liskarra telebista eskubidea zela-eta. RFU eta Sky telebista kateek Ingalaterraren partidua eskaintzeko eskubideak erosi nahi zituzten 5 urterako. Azkenean baiezkua eman du Federakundeak. V Nazioetako batzordeko lehendakariak eman zuen kanporatzearen berri. Baliteke hurrengo Torneo Frantziak, Galesek, Eskoziak eta Irlandak jokatzea joan-etorriko partiduekin. X

ARRAUNKETA

■ Sei traineru izango dira aurrez aurre gaur Donostian Karmengo estropadan

DONOSTIAKO hiru traineruak, Fortuna, Donosti-Arraun eta Ur-Kirolak, eta Zarautz, Hernani eta Santiagotarrak izango dira aurrez aurre gaur 20:00etan Kontxako badian jokatuko den Karmengo estropadan. Aipatutako untiok bi txandatan banatuta ariko dira. Beste alde batetik, Trintxerpeko traineruak irabazi zuen Plentziako Ikurrina, Raspasen aurretik. Segundo eta erdiko aldeak egon zen. X

1 FORMULA

■ Ferrarik ez du bere puntu egokia lortzen

IGANDEAN bi Ferrari autoak erretiratu ondoren, jada hiru karrera dira jarraian helmugara iritsi ez direla. Ondorioz, Italian hasiak dira Jean Todt postutik kentzeko eskatzen. Ferrariko presidentek, Todt-ek bere konfiantza osoa duela adierazi zuen igandeko karrera hasi aurretik. Iaz Berger eta Alesi zituen Ferrarik, eta teorik Schumacher bi hauek baino hobea bada ere (hori frogatzeko dago). Erresuma Batuko karreraren ostean talde italiarra bigarrena zen autogileen mundialean, 49 punturekin. Aurten 35 baino ez ditu. Herenegun irabazi ondoren, Villeneuve bilakatu da Hillen aurkari nagusia, honek gupil arazo baten erruz karrera utzi ondoren. X

FUTBOLA

■ Romariok Valencian jokatuko duela baieztatu da

ROMARIO aurrelariak Valencia taldean jokatuko du datorren denboraldian. Jokalaria Valenciara etortzeko akordioa igande gauean sinatu zen. Romario fitxatu aurretik, Valenciak Barcelonarekin lortu du akordioa. Barcelonak dirua jasotzeko eskubidea dauka Romariok 1997ko urtarrilaren aurretik Espainiako Ligan jokatzen badu. X

BOB EDME



Lesioagatik kanporatuta

Espainia Fed-Cup txapelketako finalera sailkatu zen Frautzia kanporatzean. Banakako partiduetan 2-2 berdindu ondoren, binakakoan erabaki behar zen norgehiagoka. Partida ez zen bukatu Julie Halard Frantziako ordezkaria lesionatu egin zelako. Ondorioz, Espainiak EEBBetako selekzioaren aurka jokatuko du finala. Argazkian, binakako partiduan Tauziat baionesa Halard bikoteakidea kontsolatzen.